



LUUSIP ILITAA

LUUSIP ILITAA



TITIRAQTAA

Jamaesie Fournier

TITIRAUJAQTAA

Olivia Chislett

Published by Arvaag Press Inc.

Design and layout copyright © 2025 Government of Nunavut
Text copyright © 2025 Government of Nunavut
Illustrations by Olivia Chislett © 2025 Government of Nunavut

Printed in Canada.

ISBN: 978-1-77450-879-4



Ubluq atauhiq, Luusi Ataattianilu aijauliqtuk iqalliahimagamik.

Luusi piqpagijaa qajaqturiamini ataattianinilu. Aullaaraaqhutik amihunik takuuqtuk. Ataattiap Luusi unipkaarutijaa qanuq idjuhigaluanga "taimani" inuuhuktuubluni.





“Uunaq!” Luusi uqaallaktuq. “Unaraaluk!”


Ataattiaq qungujuktuq tikkuaqhuni inukhungnut. “Ukiuqtaqtuq aallanguqpalliajuq, in’ngutaaq! Hiku mahangnariqpaliqtuq taimanimit. Hikuilruningnariqhuni upin’ngaami!”

“Taimaniraaluk.” Ataattiaq uqaallaktuq.
“Mikkautillunga – iliktut—imaa inngitut!
Ataattiarma iqalliarutivaktaangalu,
itqaumajaralu...”

“Qinmiarjuga nakhaliqpaktara
iqalliaraangapta!” Ataattiaq
uqaqliqtuq. “Kihimi qaajurnatqijaaq
taimani. Ukiurnariqpaktuq
imaalu aujaq naittuni!” Ataattiaq
aniqhaummiqtuq. ‘Hii, Taimani
aallangagaluqtuq, In’ngutaaq.”

Luusi aliahukpaktuq tuhaagiamigit
ataattiap unipkaangit





Ahiittauq, Luusip itqaqtaa ilihaijiata ilihautijait taaffumuuna taivagaat "Hilaqauhiata aallannguqtirnia."

Hilaqauhiata aallannguqtirnia imaa hila aallannguqtiqpaktuq amihuni ukiuni. Luusi ihumajuq ataattiap unipkaanginnik qanurlu hila qaajurnatqijaunginnaqtuq "Taimani," Una hilaqauhiata aallannguqtirnianguvaa?

"Hilainnaunngittuq qaajurnaijaqtuq." Luusip ilihaijiata uqaqhimajuq. "Nuna tariurlu uunnaktigtullu." Taijaa una "Nunarjuap uunnakpallianinga."




Luusip ilihaijata uqautijait qanuqtuq inuit
ikummautiqariaqaqtut annaumajaamingni—taimaa niqinik
nirigiaptingni.

Uqaqutuq taapkua akhaluutit, sikiittuut qajallu,
ikummautiqariaqaqtullu. Niqinik nirinngittutik
ikumautiqaqpaktut uqhurjuakhanik. Kaasiliq
uqhurjuakhaujuq sikiittuut qajallu atuqpagaat.

Imaalu ukuat uqhurjuakhat nunarjuaq
uunnakpaliapkaqpaga imaalu hilaqauhiata
aallannguqtirnia ingattaqtittugu.






Akhaluutivut ikumagaangamik uqhurjuakhaq
ikualaaqhugu, taimaa pujurlup publaliuqhugu.

Pujurlup publait imaa nakuunngittuq pujuq
nutqangainnaqtuq hilami taimaa hila uunnagjuumijuq.
Taimaa nunarjuap uunnakpalliajuummiqhuni, hilaqauhiata
aallannguqtirijuq.


Hilaqauhiata aallannguqtirniaq hila uunnaktidjuumijaa,
kihimi hilalu aallatut pipkaliraalu. Imaatut,
hilaluktirjuaqhugu.



Luusi uqaqtuq ataattiamut, "Ilihaqpaktaqqut una
iliharvingmi! Hilaa uunnagjuummiqhuni taimanimit—
uqaqtaqtut ilvit.

Luusip unniutijaa ataattiaq ilihaijingmi ilihautijaanik.
ataattiaq ihumagijaa taamna. Ihumajuk
pulaariaqqaak Maakuusi, ataattiap ilannatuqaa.

Maakuusip qikiqtaanut tikinnamik takujaak Maakuusi
havaktuq igluralaamini qinminilu, Solomon!





"Qanuritpit, Maakuusi?" Ataattiaq
apirijaa. "Qanuritpali?"

"Ilaa, Unniutilagit" uqaqtuq Maakuusi,
"Upin'ngaaq ajurnaqtuq."

"Uu" uqaqtuq ataattiaq, "Qanurinmat?"

"Ilaa, angunahuariami ajurnaqtuq
utuqqamut Solomon-mut uvamnullu."
Maakuusi kahaktaa qinmimi niaqua.
'Upin'ngaaq hiku mahangnariqtuq imaalu
ukiuq tamaat qajummaktuq!"

“Takkuuk,” uqaqtuq Maakuusi, “Upin’ngaami hiku mahangnariqhuni, aullaariami nakuunngittuq... IMAALU qajangnaqhibluni. Taimaa, niuvvagiaqattarnahijuq.”

“Taima havaakhariakhijuguk Solomonlu!” Maakuusi iglaqtuq. “Ajai! Igluralaaqqut hanajaqqut hamani taimaa niuvvagiaqattarnaittumik!”




“Ilaa,” uqaqtuq ataattiaq, “Luusi uqautijaanga hilaqauhiata aallannguqtirniagut imaalu qaajurnairjuummijuq taimanimit.” Luusi qungujuktuq.

“Ahu taimaa hiku tammaqtuq?” Luusi uqarmijuq.

“Ilaa, ihi!” Maakuusi angiqtuq. “Ilaali, taimaa Solomonlu uvaguk iliuraliqtavuk hiqinikkut ikummaqutit”

Luusi haluqhinnami apiqhijuq, “Qanuq hiqinikkut ikummaqutit ilauva hilaqauhiata aallannguqtirnianut?”



Ilaa, Maakuusi uqaliqtuq, "Hiqinikkut ikummaqutit Ikummautaujuq hiqinirmit."

"Nauttiatut?" Luusi apiqhijuq.

"Ihi' taimaa," uqaqtuq Maakuusi. "Nauttiatut. Hilaptingnit pijuuq. Taimaa Solomonlu atuqtaqquk ikummautiqariangat igluralaaqquk – qulliitut!"

Maakuusi qungujuktuq.

"Uqhurjuakhaqtuqhimaittumik, atuqtaagtugut imaa hiqinirmit halumajumik ikummautiqariaptingni pujurlungnik puvlaktirihimaittumik. Nakuutqijaaq."






“Halumatqijaaq Ikummautit imaa hilaqauhiata aallannguqtirnia mikkijuumirlugu. Imaalu hilaqauhiata aallannguqtirnia imaitturlu Solomonlu havalluarunaittuguk!” Solomon qiluktuq Maakuusi iglahiktuq. “Ubluraaluk hiqinnaaqtuqarialik.”



“Nauttiatut!” Luusi quviahukhuni huqulajuq tamarmik iglaqtut.

Ubluummat Luusi aigami, hilaqut ittuaqtuq ihumaliqhuni aallakut halumajumik ikumautiqaqtaariakha ikajurlugu Ukiuqtaqtumi nunallaani.

Taimaa.



HULILUKAARUTIKHAIT ILIHAIJIT



UUNARNIRMIK ANIAQTAILINIA HIKULIMI —

ILIHAUTIP TAKUURUTAA

Ilihaqtut naunaiqhiniarniaqtut aktuutaa pujurluup publait Nunarjuap uunarnia. Uvani tiguqhaqtaaqtaait uukturaq, ilihaqtut takuniaqtaat qanuqtut publait avatiptingni aniaqtailivagaa uunarniq. Qanurituujaakhaik uunarnia iluani hikuliap uvunga uunarnia hilataani hikuliap, ikajukkit kangiqhijaangita qanuqtut pujurluup publait aallanguqtittaaqtaa uunarnia.

APIQHUUTAUKHAT

Qanuqtut pujurluup publait aktuutivakpat uunarnianut Nuarjuap?

LEARNING CONNECTION

Una hulilukaarut pipkaniaqtait ilihaqtut uukturlugit hunaliqaat taiguaqtaqtik uvani *Luusip Ajuiqtaa* Qaujimanarlugu uunarniata aallatqiinit iluani hilataanilu hikuliap, ilihaqtut qaujimalirniaqtut qanuqtut pujurluup publait, unatut pujurluk (uqhurjuanit), aniaqtailivagaa uunarniq Nunarjuap aniqhaangnaqautaa. Naunaiqhainiaqtut qanuqtut inuup hulidjutainit, ukuatut sikiituuqhutik qajaqtuqhutiglu, aallannguqtuutauvaktut nunap uunarnianut ukuninnga atuqhutik uqhurjuakhanik.

Uunarnirmik aniaqtailinia
Hikulimi

LUUSIP ILITAA

Ikaarniq	Uunaqhiut A	Uunaqhiut B
Ukturahiarniq		
Aniguqat 10 minits		
Aniguqat 20 minits		
Aniguqat 30 minits		

Titirangurlugu pikaakha uukturaq uuma ataani.



AJUQHATAMINGNIK HULILUKAARUTIT

- Tiguqhaqtaaqtaat uukturaq
- Hulilukaarutit titirait
- Ilihaqatigiit uqarilugu pujurluup publait

ATUQTAKHANGIT

- Uunarnirmik aniaqtailinia
- Malruuk uunaqhiutik
- Titiraut
- Hikuliaq matulik (aallkkut: igalarilaaq nipittaaqtumik aturlutik matuittunut)
- Ubluqhiut ikaarniqhiuluunniit

QANURILIURUTIT

1. Qaritaujamit pilugu titirangurlugulu Uunarnirmik Aniaqtailinia Hikuliamit hulilukaarut titirait arvaaq.com-mit. Naamalugit ilihaqtunut aadjiliurlugit.
2. Ihuaqharlugit uunaqhiutik Atauhiq titirarlugit “uunaqhiut A-mik aippaattauq “uunaqhiut B-mik”
3. Ililugik tamangnik uunaqhiutik qaumaniup mikhaanut haatilugu narlunganirmi pinghuni minits-ni.

4. Aniguqqat pinghut minits, takuurlugu uunarnia tamangni uunaqhiutimi titirarlugik uunarniak ikaarnningalu titirarvikharmi. Una tun'ngakhaa uunarniata tamangningni uunaqhiutingni, qanuridjuhiik uvattiagu naunaijarniaqqaqhi.
5. Qajagilutit iligguuk uunaqhiut A iluanut hikuliap. Matuttiarlugu imaalu tarrarmiitittailugu uunaqhiut kituliqaak.
6. Aniguqqat 10, 20, 30 mimints, titoratrlugit uunaqhiutingani takunnatuk tamangni uunaqhiutingni titirarlugik titirarvingnut.
7. Qanuridjuhiit uqarilugit takujatik. Qanuqtut uunaqhiutinga iluani hikuliap aalauva uunaqhiutiup hilataaniittumit hikuliap? uqarilugit huuq uunaqhiutinga iluani hikuliap uunatqijauva. Apirilugit ilihaqtut huuq ihumavat taimaimmat imaalu qanuq una uukturaq takunnaqtuq uunarnirmik aniaqtailinia uvani hulijaakhaa.

QANURILIURMAT?

Uunaqhiutinga hilataani hikuliap aktuumajuq hilaptingnut taimaa aallanguqtiqattaqtaa uunaqhiutip uunarmiup niglaumaniublu katitkamik. Iluani hikuliap, aniqhaarut aniavikhaittuq imaalu niglaumanirmut kahalimaitaa. Taimaa aniqhaarut iluani hikuliap uunnagjuumiinnaqtuq hiqinnaarviugami.

Imaa aadjikkutaa uumunga uunarnirmik aniaqtailinia Nunarjuami. Pujurluup publait aniaqtailijaa nunarjuap aniqhaangnaqautaanut, taimaa Nunarjuaq uunnagjuumijuq, aadjikkutaa hikuliami anialimaittuq uunarniq iluaniittuq.

HIKU MAHAKTIQTUQ UNALU TARIUP ULITIRNIA

ILHAUTIP TAKUURUTAA

Una uukturaq ikajuutauniaqtuq ilihaqtut naunaiqhaijaangita aktuuhiaqut imaup hiku mahaktitumut. Inirrumikku hiluluqaarut, nutaqqat takuuqhimaniaqtaat hiku imarmi mahaktitiqturnia uumannga aalautqijaq hiku nunamiittumit.

APIQHUUTAUJUKHAT

Qanuqtut hiku mahaktiqqa nunami imaalu imarmi, qanurlu aktuutauva imaqqutuhia tamangni taapkunangni?

ILHAUTIMUT AKTUANIA

Uvani hulilukaarunmi, ilihaqtut takuniaqtut qanuqtut hiku mahaktiqpaktuq aallatqiujuq nunami imarmilu. Una atadjujuq *Luusip Ajuiqtaa*-nut, talvani Luusip ataattianga uqarijaa qanuqtut hiku Ukiuqtaqtumi mahaktitiqtuliqtuq ukiuq tamaat. Mahaktiqtuq hiku nunamit tariuq immaqtiqtipagaa avatqutittugu. Imaa ilihaqtut kangihipkaqpagait qanuq mahaktiqtuq hiku atajuq nunarjuap uunnakpallianinga imaalu hilaqauhiata aallanguqtirnianut. Hiku mahaktiqhuni, aktuutivaktuq avatipitingnut, taimaa inuuhiq Ukiuqtaqtumi ajurnaqhipkaqhugu qajangnaqhipkaqhugulu.

Hiku Mahaktiqtuq unalu Tariup Ulitirnia
LUUSIP ILITAA

ITQUNIARUT
Titirarlugu titirarlugilu uukturaq

Takhiqtuq hiku qattaujaq

Hiku nunamit qattaujaq

AJUIGHATAMINGNIK HULILUKAARUTIT

- Tiguqhaqtaaqtaat uukturaq
- Hulilukaarutit titirait
- Ilihaqatigiit uqarilugu humi hikummik takuttaaqutut

ATUQTAKHANGIT

- Malruuk palasitiik puukhak
- Hikuliuqhimajut
- Imaq
- Ubluqhiut ubluqhiut nutqatitautilik
- Hiku Mahakpaktuq imaa tariuq imaqtirutaujuq hulilukaarutit titiraaq
- Titiraut

QANURILIURUTIT

1. Qaritaujamit piligu Hiku Mahaktiqtuq unalu tariuq imaqqutihivia hulilukaarut titiraaq uvannga arvaaq.com-mit. Aadjiliurlugit naamalugit ilihaqtunut.
2. Qiqittiriirlutit malruungnik hikuliurutingnik. Hikuliutatit aktilaangit idjuhiillu aadjikkiiktukhat taimaa uukturutit naammagiami.
3. Upalungaijarlugit qattaujakhatit. Titirarlugu hivulliq qattaujaq “Hiku tikhiqtuq” imaalu tiglig qattaujaq “Hiku Nunamit.”

4. Tatallugu hivulliq qattaujaq qitqanut imarmik iglum iluani uunarnia aadjikkuhirlugu.
5. Piliqtinatit. Apirilugit ilihaqtut qanuriniarunaqqa ihumajaakhaita. Aturlugit ukua apiqhuutit:
 - Huniarunaqhiva ihumavit imaqquqtunia uvani Hiku Tikhiqtuq qattaujami mahakkumi?
 - Huniarunaqhiva ihumavit imaqquqtinia uvani Hiku Nunamit qattaujarmi hiku mahakkumi?
6. Titiraujaqulugit ilihaqtut Ihumagijamingnik huniaruhiagut talvunga hulilukaarut titirarmuit.
7. Ililugit qulit hikuliuqtat hivullirmut qattaujarmut imalingmut. Ililugit qulit hikuliuqtatit tuglirmut qattaujamut, imaqanngitumut.
8. Ubluqhiut ihuaqhilugu nutqatitauluuniit. Qun’ngiarlugik tamangnik qattaujak 15 minits aniguraangat hiku mahaktirniik tamangnik qattaujangni.
9. Qanurittaakhaik uqarilugit idjuhingik. Takuniaraanganik hikut mahaktiriakhait. Uqarilugit hiku imarmi qajumitqijauhiagut mahaktirami. Takuluguttauq mahaktiruhia hikuliuqtat qattaujami imaqaqtumi imaalu hikuliuqtat imaqaanngitumi qattaujami.

QANURILIURMAT?

Hiku mahakpaktuq uunnagaangami imannguqpaktuq. Hiku uunarnirmiitkumi imaluunniit imarmunngaraangat, uunarnirmit mahaktilirmat. Imaq nakuutqijaaq hilami uunarniq imaalu nuutiqhugu uunarnia, taimaa hiku mahaktitqijaujuq imarmi hilamiinnaunngitumit. Imaalu ittuq algaijaraangat uunnaktinariqtaaqtuk imarmi algaijaijaqqat taimaanginnaq uunakhirnirmit imarmiunngittumik.

LUUSIP AJUIQTAA TAINIQHIUQHUNI

ILIHAUTIP TAKUURUTAA


Una hulilukaarut iliaqtunik pipkai niaqait iliaqtut uukturiamingni ilitarniaqhugit tainiit imaalu taigurianingit ikajuqhugu Luusi qiniqhiajuq tainilluanik. Una hulilukaarut iliaqtut taigujukhivalliagiangita, kihimilu ajuiqhautiblugit ikpingnarnia avatiptigut tainiit ihuarutaujut hilaqauhiata aallannguqtirnia qanuriliuqtaujaami.

HULILUKAAQTINNAGIT

Apirilugit iliaqtut hunanik itqaumajaakhaita taiguarmit *Luusip Ajuiqtaa*. Takupkarlugit tainiit titiraqhimajut qinirniatatik titirarmi qiniqhiavikhami. Taiqqarlugit tamaita tainiit apirilugillu iliaqtut taigaangapkit taijakhaillu. Taimaa ikajuutaujuq ilihimaliriangita tainikhanik.

QANURILIURUTIT

1. Qaritaujamit piligu titiranngurlugulu *Luusip Ajuiqtaa* qinirniatatik titirarmi hulilukaarut titiraq uvannga arvaaq.com-mit. Aadjiliurlugit naamalugit iliaqtunut.
2. Titirautikhaqhiutillugit iliaqtut, ivitaarutilu, ungavalaitut titirarutit, qaumajurlu titirautit.
3. Ajuiqhautilugit nutaqqat qanuqtut qiniqhiajaakhaita tainirnik



tainiqhiurvingmi. Nukaqhiit iliaqtut ikajuqtiqariaqarunaqtut taiguriangita tainiit imaaluunniit paqittijaangita tainirnik iviqtitaaami. Ikajurlugit ikajuqtiqariaqaqtut.

4. Unniutilugit tainiit hivumuuqtaaqutut kingumuuqtaaqutullu imaalu qunmuurlutik anmuurlutiglunniit. Takupkarlugit qiniqhiavikhami qanurittaahaa tainiq.
5. Qiniqhiaqulugillu aallanik tainirnik ukunatut titiraqaqtunik (Q, X, J, unaluunniit Z) imaaluunniit (malruuk F)
6. Tainiit paqitqaangamigit, unniutilugit avataigut titirlugit, titirlugit, qaumajumut titiraunmut titirlugiluunniit.
7. Avatagut titiqata, tiliurlugit iliaqtut tainiq titirlugu taimaa naunaiqhimajaamingni kitut paqitariiqtaait.


LUUSIP IKUMMAUTIQARVIA

ILIHAUTIP TAKUURUTAA

Uvani hulilukaarut pipkarniaqtait ilihagtut aadjikkiiktirlugit aallatqiit ikummautit taapkununga atuqpauhiigut nunallaarni. Aadjikkiiqtiqhugit ikummautit hilajuaptingnut uuktuutit, ilihagtut kangiqhijuummirniaqtut qanuqtut ukua ikummautit pauvaqautaujut hunanik atuqtaujunik takujatik avatimingni.

HULILUKAAQTINNAGIT

Ilihagtut kangiqhipkarlugit hunaujuq ikummaqautit ilitturipkatinagit aallatqiinik ikummaqautinik. Ihumaliurutigilraarlugit aallatqiit ikummaqautit. Itquumapkarlugit uvani *Luusip Ajuiqtaa*. Uukturutaa. Taiguakhami, Solomon atuqtuq hiqinikkut ikummaqautinik qulliqariami igluralaamini. Hiqinikkut ikummaqautit ikpingnaqtut nunallaanit ungahingniani ikummaqautiqanngilrumi. Unniutilugit hiqinikkut hiqinirmit ikummaqautiqaqtut ikumajaangita alrujaqtuqtut, ikajuutaujut inungnut maniqqamiittuni ikummaqautiqariangat aimaviktik. Uqarittaaqtahi aallat uukturat taiguagarmit, ukuatut qanuqtut kaasiliq atuqtauvakpa ikummaqautiujut ingniqutinut, sikiituunut, qajarnullu. Imaaluunniit uqautilugit niqit hakugikhautaujut inuit timiinnut. Una ikajuutauniaqtuq ilihagtut kangiqhijaangita qanuqtut aallatqiit hakugikhautaujut ubluq tamaat inuujaami.



QANURILIRUTIT

1. Qaritaujamit piligu titiranngurlugulu Luusip Ikummaqautiit hulilukaarutit titiraq uvannga arvaaq.com-mit. Aadjiliurlugit naamalugit ilihagtunut.
2. Ilihimalugit ilihagtut pittaaqtait ivitaarutaujukhaujut, ukua ivitaat, ungavalait titirautit ukualuunniit titirautit ivitaaqaqtut.
3. Ilihimalugit ilihagtut ivitaaqtut piksainik hivullirmik.
4. Uqautilugit ilihagtut aadjikkiiktirilutik aallatqiinik ikummaqautinik (ukua hiqinirmit, anurimit, paurmit, imarmillu) ukuanut qanuqtut tamaita ikummaqautit atuqtauvaktut nunallaani. Ihumagijakhait qanuqtut taapkua ikummaqautit havakpagiakhait imaalu huuq hunanullu atuqtauvaktut.
5. Unniutilugit ilihagtut taapkua piksat haumingmi hulilukaarutip titiraup takunnaqtut aallatqiit ikummaqautit, imaalu piksait taliqpiani takunnaqtut qanuqtut atuqtaujut ikummaqautit.
6. Ilihagtut titiraqulugit narlungajumik titirlutik taaffuma ikummaqautip haumingmit ihuaqtumut taliqpingmiitunut.
7. Kiutinnagu apiqhuutit ataaniittuq titiraup, uqariqatigilugit ilihagtut apiqhuutinik. Titirarlugit kiudjutigijait titirarvijuamut ikajuutaujukhat. Titiraqulugit tititaujarlutiglu ilihagtut tamaita atauhirmik atuqpagaat ikummaqautit aimavingmingni, aturlugit titiraqhimajut titirarjuarvingmi.

IHUAQHAIQATIGILUGU IKUMMAQAUTINIK LUUSI!

ILIHAUTIP TAKUURUTAA


Uvani hulilukaarunmi ilihagtut atuqtaagtait iglugiiktuutitik imaa kangiqhijuummirniahutik kituujut ikummaqautit nakuunngittut avatiptingnut hilami kitullu ikummaqautit nakuutqijaujut Nunarjuamut.

HULILUKAAQTINNAGIT

Una hulilukaarut aturlugu uqarihuiruffigit nautqiktaagtut ukualu nautqilimaittut ikummaqautit ikajurlugit ilidjuumigiangita ilihagtut ilihagtamingnik. Taiguagakhami *Luusip Ajuiqtaa*, paqittitaaqtutit tamangnik aallatqiit ikummaqautit.

QANURILIURUTIT

1. Qaritaujamit piligu titiranngurlugulu Ihuaqharlugit Ikummaqautit ikajurlugu Luusi hulilukaarutit titiraq uvannga arvaaq.com-mit. Aadjiliurlugit naamalugit ilihagtunut.
2. Ilihimalugit ilihagtut pittaaqtait ivitaarutaujukhaujut, ukua ivitaat, ungavalait titirautit ukualuunniit titirautit ivitaaqaqtut ukualu nipitirutit kivjautiniglu.



3. Ilihagtut ivitaaqtillugit pinniqlarlugit ikummaqautit piannannguat.
4. Ivitaaruirumik, kivjaqulugit ilihagtut kikkariktut ihuaqtumik. Ikajurlugit ikajuqtiqariaqaqtut.
5. Takuuqulugit ilihagtut ikummaqautitik piannannguatik ihumaliuqulugit kitut ittukhat uvani “Nunarjuamut Nakuujut Atugakhat” titirarvianut imaalu kitullu ittukhat uvani “Nunarjuamut Nakuulluanngitut Atugakhat” titirarvianut
6. Tuglirmik, ilihagtut nipitiriniaqtut ikummaqautit piannannguat ihuaqtumut titirarvingnmut. Ikajurlugit ikajuqtiqariaqaqtut.
7. Pihuglutit ilihavingni ikajurlugit ilihagtut ikajuqtiqariaqaqtut. Una aturlugu naunaiqhajaarni nutaqqanik kangiqhijunik imaalu ikajurlugit ihuaqtumut kiudjutaanut.

EXTENSION

Hulilukaaruiruvit, ihumaliurlutit havagiarni ilvit pikharnik hulilukaarunmit tamainnut ilihagtunut takujakhaanik takhijuumiutigilugu una ajuiqtamangnik atuqhimajamingnik.

KANGIQHIDJUTIT TAINIRNIK

Hilaqauhiata aallannguqtirnia

Hilaqauhiata aallannguqtirnia imaa kangiqhinnaqtuq taimanimut aallangirnia Nunarjuami hilakkut idjuhiit uqquuningalu. Ublumi, hilaqauhiata aallannguqtirnia inungit hulidjutainit pivaktuq imaa ikualaaqtittiblutik uqhurjuakhanik, taapkua pujurluup publaa anialimairutibluni nunarjuap aniqhaarnaqautaani.

Ikummaqut

Ikummaqut havaktaariami imaaluunniit aallanguqtitaigiami. Ikumapkaqpagait hunaliqaak iglunik akhaluutiniglu ukununga uqautitautinik tigumianik. Aallatqiinit pivataujuq, ukuallu uqhurjuakhanit, hiqinirmit, anurimit imarmillu.

Uqhurjuakhaq

Uqhurjuakhat nalvaaqtautaaqtut Nunarjuami ukuatut, paukhanit, kaasiliinit, nauhimajut taimaniraaluk nauhimajuvinirnit huradjanillu tuquhimajut taimanirjuaraaluk. Ikualaaqtittibluni uqhurjuakhanik ikummaqutaujuq, kihimi pujurluup publaliuqrutaujut hilaqauhiataanik aallannguqtirutaublutik.

Nunarjuap uunnakpallianinga

Kajumiittumik, uunnakpalliabluni Nunarjuap hilaa tarjualu qaffini aniruqtuni ukiuni. Taimaa hila qaajurnaqhivakhuni aallanut hılanut aulabluni, uunarniraluanga uunnagjuumivalliajuq.

Pujurluup publaa

Pujurluup publaa aniaqtilimaiqhugu uunarniq Nunarjuamit aniqhaangnaqaataa, aadjikkutatut qanuq pujurluup aniaqtilimaiqhugu uunarniq nauttiat uqqumagiangita. Ilangit pujurluup publaa naammaktut imaalu ikpingnaqhutik kihimi ikualaaqtittugu uqhurjuakhat pujuuqpallaaqtittugit pujurluup publait. Imaa aulajugut nunarjuap uunnakpallianinganut imaalu hilaqauhiata aallannguqpallianianut.

Hiqinikkut ikummaqutit

Hiqinikkut ikummaqutit ajurnaidjutaa piblogu hiqinnaaarniq ikumautauvagianat. Halumajuq ikummaqutaut ikajuutaujuq mikhijuumiriangat aturnia uqhurjuakhanik imaalu aniarpkainiq pujurluup publaanik nunarjuap aniqhaangnaqautaanut.